

四庫全書

集部

欽定四庫全書

集部
秋澗集卷四十七

詳校官侍讀學士

臣沈咸熙

侍讀臣孫球覆勘

總校官降調編修

臣

倉聖脉

校對官助教

臣

汪錫魁

謄錄監生

臣

保英

欽定四庫全書

秋澗集卷四十七

元 王惲 撰

行狀

故真定五路萬戶府參議兼領衛州事王公行

狀

曾祖諱某

祖諱某

父諱某

昔王延州有云君子有惠政而無異政史臣傳循
吏而無能吏故班孟堅叙龔黃鄭召諸人曰生有
榮號死見奉祀廩廩德讓君子之遺風矣德既肆
乎循政復極乎惠求之今人其惟王衛州乎公諱
昌齡字顯之姓王氏滄州人世雄於財以孝義著
稱鄉里公少穎悟不凡業儒學嶄然見頭角故大
父臨終嘆曰王氏之宗善積有素嗣續弗絕必矣然大
起吾門者必在此子也貞祐初滄景被兵破公以

孤童子能依彊濟難間行歸汴抱負奇節時人未
之知也正大末京城戒嚴北面元帥府以材幹
辟公授帥府經歷官積勞遷明威將軍陳州防禦
判官適書大丞相政總兵民撫鎮河朔開幕府舉良能
恢弘父兄之業用薦者起公參議幕府事公遂悉心畢
力知無不為故得感同風雲合若符契國朝有事東南
城攻野戰餘二十年公籌畫戎幄應變機權無戰無之
以至冒矢石輸忠力作士氣雖一時輔佐有不克負荷

者初王師次安陸負險之民盤結山谷間備禦完固艱
於力取公慨然以招諭降集請行時人危之既抵壁宣
示恩信喻以禍福竟以招降而全活之歲丙申冬天兵
次光州時餉道不繼主帥命公率十餘人乘筏入焦湖
督運中流遇賊甚劇衆怖亂筏傾身沒於水者半公獨
神色益壯持兵殊死戰賊潰護所運以濟軍士賴之大
振遂取光州凱還丞相嘉公伐謀制勝之略遂留公居
守公遂附安反側市肆不易安堵如故幾於一載及策

欽定四庫全書
欽問集

既難其人特命公領其事公下車以來敬以奉上恭以
執事巨細不遺知所後先哀民之困於繭絲也均徭平
賦以畜其力痛政之極於汚染也治官汰吏以清其源
并容細民不擾市肆懋遷有無以通舟車隄防以捍
水灾課農桑以抑游手尊王人則修飾官舍免病涉則
平治橋梁勵薄俗扶善良禮賢俊賻貧乏行郭郭廣居
廛通商惠工興滯補弊民不見吏而無吠警之虞士格
所恥咸有聞知之懼蓋公之治化謹身帥先居心廉平

不至巖而已衛自亂餘以來民耕植居郡東者多而泉水自鄘城而下崖岸平流駛如掌上稍東復與淇水合秋潦時至涇流之大南際漢金堤田廬為之一空公為隄黑蕩陂以禦之遂絕橫清之患清水出山陽白鹿嵬公乃度原隰創溝澮溉田餘數百頃其興起汴利如此朝歌介邶鄘之間地迫山麓灌莽極目盜闖出沒越人於貨行者苦之公乃建議於漕臺周侯德甫州而縣之驛亭平襄南樓頓丘於是淵數之患息駟騎之力紓焉

而德之波及鄰土者又如此既而丞相材公之為酬公之功以其子復充同知衛州節度使事遂有撫卹軍民均平差役勸課農桑裁決詞訟治效極多之譽誠以八年之間熙然而春郁乎其文樂國多士之風還舊觀矣已亥春例上計行臺惟法苛猛公不忍甫息之民橫被侵暴遂乃道巴峽抵忠渝哀鳴相府中有以彌綸之也雖獲所請竟以憂勞致疾東歸以是年十月廿日卒於號縣之斜坡里春秋六十有三越十一月葬於汲縣王

尚村之西原送喪者餘萬人攀號祖奠凝慕不已其貴
官名士若庫庫左丞姚司農張左轄參卿王仲禮宣撫
張子敬耆德孫元輔段季昌咸遠道而致祭衛人思之
如戴父母明年相與起祠宇立遺像植豐碑壽遺愛歲
時香火之奉其嚴如生公姿明良安雅德量無涯涘風
鑒表表口不出臧否飭吏以儒外彪中弼慈祥豈弟喜
愠不形於色務明大體憫悞無華持論深長操守匪石
其待人御物純以至誠感發人心諄諄訓導若嚴師慈

父有銘骨不能忘者初京城被圍友人某以罪逮捕抵公為舍匿之竟以獲免焉制徒單雲甫肥遯鄰邑聞公之典衛也幡然來歸為治堂黌極賓禮選子弟之開敏者從而師之自是郡之文風尤為熠興又曹取齋通甫由趙來依疽發背自病至終公醫極殯送曲盡友義北渡後元遺山號稱一代士林之宗愛慕高義乃有今而後寒士知所歸之嘆每自公退食盤饌稍盛必撤去之曰無暴殄天物及宴樂賓客供具豐腆盡於殷厚曰儉

於人則不可也餘暇則閱書史接文士晚年尤喜作詩
歌詠風流不知老之將至至雄章傑句間見層出兼善
尺牘行書嘗謂下客王惲曰吾少業儒以時艱罔卒所
志然胸中緒餘之氣勃然日新矣其好學又如此愛
其子擇師而教之因訓之曰我不願若富貴能儒素起
家敝廬饘粥生養死葬足矣故於諸生獎藉作成爲尤
至所交皆天下豪傑其推賢讓能而升諸公者如中山
楊西庵盧龍盧叔賢河南鄭子周陽夏董端卿皆一時

材大夫也公之歿丞相墓祭而哭之曰昔公勤勞我家三十餘年事無巨細咸仰決焉豈其天奪之速而至於斯俾予煢煢然在疚至有失明折肱之喻哀號之聲感動左右其為賢主人所惜如此不可謂不遇也不可謂不達也故論者評公之惠愛類鄭子產忠貞類漢王常智周事悉類蘇令綽權闕望雅闕事

闕之其樂於為善之心又如飢渴之於飲食也苟

推而行之天下其功烈豈止是哉夫人姓陳氏闕

人生子男一人諱復少負鑒裁無所於間通達政體用丞相廷薦宣授衛輝路總管事其綸章諭之曰故參議王顯之才行相輔政恕中行俾治衛輝民安事辦今子復良有父風以繼述之事考之誠無愧負矣孫二人曰雪山曰鐵山女孫一人曰幼安嗚呼公生平事業智名勇功囊括無迹恐蕪類之辭不足發越盛德之萬一敢以區區聞見播在輿頌之實者勉為具述託立言君子而圖其不朽焉中統三年秋九月廿有九日門下王某謹

狀

太一二代度師贈嗣教重明真人蕭公行狀

師諱道熙字光遠本姓韓氏其先汴州人五代祖銀青
榮祿大夫璿自唐季來隸於衛魯祖奕山舉茂材祖渤
進士第父矩隱德不仕度師其仲子也師為人英偉眉
目疎秀豐下美鬚髯三歲識字六歲能書棲心教法儼
然注蕭門二葉之望金正隆間始祖一悟真人以神道
設教上動人主所在翕然從風韓氏舉族清修師母闔

尤極信心深入法海既孕若病父請禱於真人真人曰
汝韓氏素植善根當產異人且昭陽報然將來必佐吾
法門可服吾丹書以安胎息久之母感異夢既寤師生
果稟奇相充閭之氣肅如也纔免懷留養道宮受度為
道士復先訓也再命而受清虛大德之號大定六年冬
十有一月真人羽化於萬壽丈室師緣經哀感如喪考
妣於是相宅兆具葬儀及殯整整有法綱而不紊觀者
咸嗟異之時師甫滿十祀耳既窆師乃陳寶籙法物具

香火陞堂以二代嗣事諭衆有門弟子芋道省劉道固等思有以大厭衆心稽首求頌且問師它生云何賢聖師即走筆批曰明月清風大德頗訝愚人未識忉忉詢吾為誰只是從來太一衆遂驚服歸心焉九年朝廷歆其行異勅立萬壽額碑於本觀是後聲教大振門徒增盛東漸於海矣初真人謂靈章寶籙率天神持護遺命起臺中央上為壇屋鐵作戶牖庶幾神靈游居有以安安之師乃擴充尊訓尊光圖籙締構層閣制極壯麗揭

以靈章寶蘊之名歲時醮祭為衆生進階之地復建朝
元觀為祖師墳原道場仍植豐碑表景行不數寒暑
內外修治輪與中度師直以德教感化曾聲色不動門
人子來如趨父事十一年時師殆十有四臘門人鉅鹿
李悟真者造請何為仙道師曰做仙佛不難只依一弱
字便是耳曰弱者道之用也悟真既授旨辭還師曰可
速還汝當遷矣明年李不疾而逝殯七日形色如生及
壙舉棺蔑如開視之從中一白錫飛去餘衣衾而已衆

始悟師旨當遷者即仙也其慧悟如此一日師曳杖逍遙謂左右曰吾旦夕欲馳四方可趣治行裝已而世宗詔求海內名師宗主天長觀事師遂幡然應詔不閱月戶外之屨滿矣師密削疏聚精以備儲乏既而秋旱京師物涌貴提點陳公者請行化畿內師曰君休矣吾已辦之或者疑焉不數日陸輦川舟全集於門下衆服其幾沉物先德博而化時大定十四年也明年春辭還鄉里後四年復往趙之太清觀適境內大旱衆禱雨於師

曰今蘊氣隆鍾願垂慈請命上帝師曰若等宜先竭誠徧走羣祠弗應當以吾法行之越三日不雨師乃書飛雷掾旱符一道張淨几上復呪法水數石令州將已下人酌水沃符畢雨即來矣行未竟雷電雨且尺歲賴以熟迄今趙人能道其事後二年興陵夢師冠履上謁寤思之遂徵至內殿問以攝生之道對曰噓喻精氣以清虛自守此野人之事今朝廷清明陛下當允執中道恭己無為而已聖躬為之興禮及還寵錫甚渥廿六年秋

師忽思棲真巖壑因密謂蕭道宗曰吾門衆萬數試經
具戒者完顏志寧王志沖而已然志沖特純精廉潔可
屬後事遂設大醺告禰廟畀之傳代秘錄曰君太一第
三祖也及銘所付法具云有德輔德天孰可欺慎之敬
之永保教基居無何棄几席謝去或問安所之曰吾將
遍禮名山與心君作天遊耳遂去後不知所終師丰儀
瀟爽德宇冲粹博學善文辭動輒數百言樂與四方賢
士大夫游談玄論道造極精妙書畫矯矯有魏晉間風

格嘗自題畫像云來自無中來去復空中去來去總一般要識其間路其明達又如此生平好賑施養老卹孤近百人人以鏹五千月給為率死乃已貧者喪不能舉衣被棺槨為俱具之至於持行法籙捕逐鬼物風聲肅肅除治戶庭間殆古之能吏然精一之誠貫達幽顯降度之功洋溢一世矣師之玄孫某以貞常溫裕為五代人天之師服膺先訓追遠盛德心藏不忘越己卯春具大招之禮葬衣冠於祖塋之側今皇帝登極之三祀光

崇玄化貞常師以祖德範圍請諡於朝追贈嗣教重明
真人噫道家者流其術固已多矣而太一之法輔行世
教有不可勝言者其鴻靈幽秘變化叵測通徹神明之
功幾於上下天地把握陰陽者矣然苟非其人道不虛
行一傳而至推廣悉備若真一人弘衍博文繼志述事
之善者也翰林修撰兼國史編修官王惲狀

故金吾衛上將軍景州節度使賈公行狀

曾祖鑑

祖璋

父政

公諱德字克仁姓賈氏景州蓟縣從教鄉劉卿里人其
系緒見學官王鼎所撰衍慶碑賈氏前宋時出行管都
團練使用威府君之後曾祖鑑志操高潔恥襲蔭不仕
家素饒財以周急賑乏為事祖璋性勤儉專事農務故
貲益雄鄉里父政事親孝處昆弟間無間言宗族以純
至稱生二子長曰贊早卒次即公資秀穎在垂髫時舉
止如成人禮既冠慷慨有遠志樂施予不屑屑拘小節

嘗與鄉人處事談辯雄偉無出其右衆屬目異焉曰興
賈門者必此子也自是事有疑率質成於公貞祐初燕
不能都德陵南幸汴郡盜蠡起河朔在冀部滋甚瀕洶
翼混亮炤所灼里陌為蕭條公慨嘆壠首曰大丈夫生
世不能除暴薙亂建勲名於時掇取富貴戴履兩間寧
無愧怍羣俊少壯其言恃其勇往往依附為用州將材
公為且知衆素所推服自白衣署公為故城縣丞專徵
巡事於是設方畧窮根株破機牙擒捕招諭不數月寇

難盪平尋國兵入中夏太師國王營屯彌亘原野聲勢
大烈震撼河岳元州將某舉城降無幾宋將李益都全
乘隙西畧甲戌歲州遂為全所得盡繫官屬妻子以東
太師聞變赫怒擁盛兵為屠城之舉公白於州將曰反
復際明以力不支故至此況天道人事嚮背瞭然詎能
以智計免哉不早為所裋將噬臍願躬詣軍門請命遂
間行至深州帳下太師察公忠誠慰諭殊渥許其請闔
城賴以全活太師承制拜公定遠大將軍賜金符提控

本州兵馬事丙戌歲太師帶孫郡王南畧晉衛明年復東徇魏齊皆從以行其破上黨馬武大名濟南及信安水柵與三齊動兵闚穆陵厯山下俱獲大功英威騰奕冠諸將列益為太師郡王所知遷鎮國上將軍節度副使兼右副元帥仍改佩金虎符時江陵齊東寧晉與益都界犬牙相入賊李蠻奴窺主簿者引海寇不時侵軼為百姓患公連戰破之東鄙遂安陞授金吾衛上將軍景州節度使歲丙申以脩縣城東光阜城吳橋故城隸

焉歲丙申六太子復命以分地所入江陵齊東寧晉八
城俾公總治其事公為人恬退每物盛為戒丁未歲年
五十有二即致政閒居日課家僮輩躬瑣事澤車款段
優游田野間人不知為故侯宿將也至元十一年甲戌
秋七月二十八日以疾終於劉卿里私第之正寢享年
八十有三公臨政剛明有斷僚友間容辭謙讓急於持
吏惠以養民卒之畏而愛威而不猛循循然有古良吏
風初州將以甫離搶攘人心轉側頗任刑立威所犯有

事重而情輕者有情連而力嚇者公為析理營救多所
昭雪以從輕議又同列馬侯子趙君妻男幼女彈壓宋某
氏者被擄胥靡營幙間公傾橐資贖而良之其輕財重
義類多此生平喪祭為尤重嘗謂宗屬曰兵荒來上數
世殯淺土德又早失怙恃其於大葬之禮非竭力盡心
罔極之恩何所圖報遂大治塋域表叙昭穆封植林丘
而安而厝禮莫不備復樹豐碑紀世德以見夫祖宗陰
積所致之厚一郡有光焉性喜修潔裘馬鮮整自少若

素宦然稍涉書傳善左右騎射矢不虛發時輩無與之
比公八秩時往讌從教別墅二貌起田間飛鞚回射獲
焉其精力老不少衰蓋如此夫人高氏蘇氏魏氏劉氏
魏氏以賢配稱夫人梁氏施氏張氏馮氏王氏李氏亦
俱有淑行如夫人者三人楊氏張氏趙氏子男一十八
人曰茂宣授金虎符昭勇大將軍左翼侍衛親軍都指
揮使行淮東左副都元帥府事謨勇忠謹以良將稱善
射蓋家法云曰著前宣差景州管民長官曰莘未仕曰

芳樺車弩千戶曰蔚未仕曰英宣差滄州節度同知性
方直有從政才曰仲溫前景州課稅所長官廉能有幹
局曰毅前河間路諸軍鄂囉總管曰萍前征行千戶曰
僖曰蕙未仕曰玉前征行千戶曰芝未仕曰嵩前景州
勸農提領曰彬曰仲信曰進曰璧俱未仕女一人嫡夫
人高氏所出適侍衛親軍千戶張琬男孫四十九人茂
之子奈曼岱宣授金牌侍衛千戶重孫一十八人兄贊
子一人曰榮前景州鄂囉千戶榮之子三人重孫二人

嗚呼盛哉十四年丁丑春元帥嗣侯茂暨弟仲溫介參
謀趙君禹卿提點李練師子玄來謁予曰先都帥祔葬
墓木已拱比年國朝方平一江左不肖忝居戎右用是
其未見神道者未即樹立以慰下泉霜露之愴不遑寧
處今將託立言君子圖其不朽焉敢再拜以事狀為囑
遂勉為次第之

故蠡州管匠提領史府君行狀

府君諱忠字良臣姓史氏蠡州博野縣孟家里人曾大

父暨祖世在博野俱以伯仲稱父諱成繼業耕稼善因地利自高祖以降昆弟宣多至府君凡五世同居藹然以孝義風一鄉君兒時日痔錢鏹為戲及長姿純厚與人交不妄言謹身節用致桑土滋植然慷慨有顧慮料事多合情得宜里人推其識量凡所疑滯必諮焉而後行貞祐初國兵入中夏蟲被圍太守持格嬰城自固民懍懍崩角莫知所屬欲鳥獸散公約衆合謀曰金駕而南委河朔去州又自顧不暇事勢至此吾輩將安所託

正有畏天順時得全性命為計之上不然何為束手俟
死衆以君素有畫可仰聽焉遂率孟莊鐵千兩河夏村
等老稚百餘人持牛酒詣太師國王行帳投附王矜其
情許焉命公前慰諭者良久且給符約遣各歸田里尋
州破鄰鄉多被屠掠惟孟莊兩河等里得安堵如故兵
後歲飢疫公惻然興感曰家幸贏餘胡可坐視鄉人轉
死溝壑即出益藏粟五百餘石計口而惠之賴安活者
甚衆其散而復業者往往力殫具乏公為假牛畜耒耜

曠種有因疾田蕪不克治者公廼侶結義社相掾助於是秋獲皆有得家具酒食勞公以謝其德公曰患難相卹人之常道奚謝為第比年來仰荷天休稍即溫飫不以禮道維持羣居雜處未免侵犯爭鬪之事衆對惟君見訓俾終厥惠君雖不經見聞遇子弟必申以孝義父兄則勉以恩愛聞順而善事者必需之飲食以蓄其良心彼游惰有安狎於不順者即畏以官府使其懲戒於是田里安集不知出喪亂之餘而有讓畔敬饁之漸每

入夏設粥瀦於路以濟行人其周急濟物類如此聲稱
傳播時人有義門史氏之目州總匠王公興秀賢其為
曰吾嘗聞居家理可移治於官遂薦於行省劉公署工
匠提領府君感其見知盡心所事於是配能否均程課
革舊弊皆有條次不紊及考工器率堅良精緻且合時
度不為巧虛積料餘繳幹局稱入未嘗竊徙工治已私
以自腴總匠每稱能以勵其餘某年月日以疾終於家
享年八十有五葬孟莊北原先塋之次識者謂公德純

行美効官及物者甚廣其儲祥萃慶不在其身而子孫
將有勃然興者娶同里某氏柔順勤儉克配公德生二
子長曰伯祥次曰伯福幼承訓道俱孝而友或以襲父
職為言伯祥曰吾家世服井畝以孝弟相傳逮吾先人
輕財重義表率一鄉雖遭罹世故所直挺挺然大先業
為光今予昆弟二人無所肖似繼守田廬負薪之責惟
罔克是惕第知勤敦菑畝修疆畝寒耕熟耨濬源培本使
先世之澤淳蓄汪濊霑溉後人俟其可以起史氏者乃

所職耳聞者歎其志遠而有所見也及子弼長性謙謹
寡言笑顏赫然軀幹魁偉孔武有力年十六七時耕牧
田間午枕桑蔭下父往饁遙視睨有玄虺穴其口父大
駭趣呼之寤問焉曰無所覺自是手力愈若神助遂精
習挺槊又善左右騎射赳赳然負干城之氣總匠王公
子前潼關使彥弼異而妻焉舉於左丞相耶律公一見
奇之得給事省府適考工上新製鐙弩力踰十鈞近臣
有言弼材勇善挽此者即召見試有驗命列名扈從仍賜

白金御驃以壯其勇不一二歲譯語國字皆通習之嘗奉旨數軍實於邊營岳祠於洛精簡而敝去壯麗而費省由是廉幹之稱聞於朝上知其可用至元己巳命佐帥臣劉整南伐轉戰江漢間若鏐峨眉掀松楊拔樊城下襄陽飛渡大江併圍維揚率肉薄先登及論功每在諸將右寶鞍錦服寵賚殊渥始自漢兵總管授金虎符懷遠大將軍行軍萬戶加定遠安遠陞昭勇大將軍淮東大都督改揚州達魯噶齊今由鎮國上將軍進中奉

大夫參知政事行黃州路宣慰使既拜命乃謀於婦翁
奉直曰弼自惟起身隴畝遭際風雲被沐恩遇以汗馬
微勞不十五年間仕至將相其於史氏榮之極矣茲蓋
祖宗勤苦純儉累積攸厚一旦發越於藐焉之躬者如
是不顯可不知其所自哉欲報之德有懇求懿筆著信
於後者論述陰積表樹丘壠而傳不朽庶幾顯揚之道
奉直曰宜矣遂託樞相贊皇趙公及關使王君以事狀
求屬因勉為次第之中奉大夫之父今年六十母夫人

某氏若干壽皆享有全福叔之子曰輔管軍千戶次曰
翊未仕中奉之子曰蟲奴女一人曰燕哥至元戊寅三
月晦日謹狀

太一五祖演化貞常真人行狀

師姓李氏諱居壽字伯仁道號淳然子衛之汲縣西晉
里人生有淑質沉默寡言笑自幼喜道家之學年十三
拜太一四代祖中和仁靖真人為師旦夕給侍左右進
退應對容度詳謹中和知其可教甚善待之戊戌歲受

戒為道士命典符籙科式等事錄文部帙靈章寶篆仙
階顯職稱號廣博師裝繕嚴整銓次詳明大稱所委士
子歲聖主居潛即駐蹕嶺上以安車召中和真人於衛
既至燕見之次薦師才識明敏志行淳和請傳嗣為五
代祖仍從誓約易姓為蕭即蒙允可賜為貞常大師仍
授紫衣其年冬中和謝世中和人品道價高賅一世師
嗣挈玄綱以簡重堅潔持守成規洞洞屬屬若恐失墜
及其張皇道紀醻酢事宜其應如響由是徒衆厭服聽

約束惟謹前人之光曾不少佚時衛大旱守官致禱於
師即書太一靈符浸巨盎中騰呪未畢雲葉膚合澍雨
霑足致德譽日廣上聞於朝己未春上南巡駐蹕淇右
重師之請幸所居萬壽宮悵真仙之倏去喜十界之得
人周歷殿廡詢慰者久之師敷對誠欵允協睿意眷顧
光寵於焉伊始明年庚申中統建元春正月命師即本
宮設黃籙靜醮冥薦江淮戰歿一切非命者迎奏際陰
風淒淒若有趨赴慘泣之狀秋九月詔赴闕下上親諭

修祈禱金籙醮筵翼日特賜號太一演化貞常真人二
年冬上命崇斗於厚載門親詣祝香仍賫錦紋綾帔四
年秋遣近侍護師頒香嶽瀆等祠仍賑濟貧乏至元三
年以京師劉氏宅賜師為齋潔待問之所六年春皇嗣
請師禱祀上真用介繁祉受釐之餘遂賚師金冠錦服
玉佩符馬八年螟蝗為災命師即岱宗汾睢設驅屏法
其秋乃大熟十年正月就上都大安閣演金籙科儀時
春寒賜黑狐裘貂帽各一冬十月奉安真武神位於昭

應新宮禮畢中官衣以異製綾道服大內青宮肇造之初皆詔師按太一符云襪鎮方所十一年特旨於奉先坊創太一廣福萬壽宮中建齋壇繼太保劉東忠裡六十神將歲給道衆粟帛有差十五年奉旨祭七元星君於西府鐘室啓告之初期以風動所樹幡標為神君格思之驗既而儲皇親臨炷香冷颼颼至幡影颼颼從官劍佩鏗鏘肅然為起敬明日具陳其事上甚喜越明年以事辭結遁壇命易七元斗位聖上儲皇以師積年祭

禱精誠多獲靈應前後賜與如玉尊像寶粧劍安車龍
杖金銀器皿等物不可殫紀師爰自傳嗣以來奏言始
祖曰太一一悟傳教真人二代祖曰太一嗣教重明真
人三代祖曰太一體道虛寂真人四代祖曰太一中和
仁靖真人焚黃昭告典禮華縟存歿有榮焉至元三年
以重修祖觀殿宇告成以聞蒙勅辭臣製碑鋪敦教基
具紀本末復奏授保舉師張善淵真靖大師教門提點
監度師高昌齡保真崇德大師高第李全祐觀妙大師

范全定希真大師父欽承璽書護持玄門其弘闡宗教殊為光顯師以至元十七年七月二十六日羽化於西堂方丈享年六十治命令觀妙大師李全祐嗣主法席訃聞上嗟悼久之儲皇賻楮真三十定仍諭中書省給威儀祖送其年十月遣使護喪歸葬衛州汲縣四門村祖塋之次師丰儀修偉清修有操行謙虛篤實不事表襮混然與物無忤而胷中風鑒殊皜皜也與人交誠欸有蘊藉所談率以忠信孝慈為行身之本未嘗露香火

餘習生平問學不斯須離如饑渴之於飲食其易傳皇
極三式等書皆通究其理晚節德量弘衍博大不可涯
溪宜其為聖皇挹真風屬祕祀留宿宮禁參預庭議師
素以憂深思遠理或未暢形於顏色設因方便而需德
澤之庇即詢訪而裨時政之闕橫覆道蔭成敷錫之美
者多矣惟其玄默不出叵得而詳論者謂師雖方外士
其至誠上感蓋有君臣慶會之契古人稱上士學道輔
世主以洽好生之德師其有焉既窆之二年嗣教真人

將以師官行請於朝植碑神門揄揚追報以慰華表歸
來之想以不肖憚與師義同里閭交且久知師為頗詳
以事狀見託謹按綱首楊某等所具行實勉為件右庶幾
太史秉筆者得以採擇焉至元十九年十二月二十一
日中議大夫治書侍御史行御史臺事王憚謹狀

秋澗集卷四十七

欽定四庫全書

秋澗集卷四十八

元 王惲 撰

傳

大元故宣武將軍千戶張君家傳

君姓張氏諱思忠字正言廬龍永清人也曾祖衍大父
德輔世業農金百年來支屬蕃息居不異爨至今以義
門稱燕朔間父諱全姿沉粹少以易業起家為志大元

甲子大兵南畧以良家子從軍隸都元帥史公麾下以武幹見稱凡意料且與公契及公鎮守真定得專擢拜以功監領左軍充唐山邑事既而開府忠武公紹襲闡職首以鎮撫授君歲壬辰以千夫長從公略地河南歸德禦堅猝不易拔君鼓勇先士卒登且以戎鎧鮮異為大帥蘇布赫所識及賞犒以功讓所善高信由是信拔出行伍致身顯達遂轉戰密之西山民避兵匿洞窟中往往縱火薰逼君言諸主帥禁焉賴全活者甚衆其後

從成陽夏開邊屯受戍整暇兵有餘力而民風愛懷繼
移鎮入鄧凡百草創都督史侯皆擬易治一新君依前
以鎮撫供職於是招流散復田廬治渠堰整屯戍謹斥
堠咸領辦有方不大聲以色人至以佛張鎮撫目之其
慈祥為可知丙辰春壽六十有一遭疾終鄧之官舍葬
真定縣臨濟里域夫人趙氏後公十九年歿生子六人
宣武君即其長也宣武幼不好弄嘗聚嬉里門能威重
自居指顧羣兒不異官府識者已稱其不凡知學穎悟

既不羣及長有謀畧善騎射大都督一見與語奇之命
日侍鈴下庸王汝之幾冠嗣父職適有事江淮風雲交
會之際宣武年少英發夙夜聽恭不遑寢餽氣益厲志
益明事益辦時軍府有疑獄久不能決命審鞠之畧不
加威而窮奸直枉兩造精露闔府與其明察至於繕城
壁建樓櫓使號令精彩一軍增雄雖謀出於上其所以
廣益於下者多君之力也丞相忠武公奏降銀符真授
都督府鎮撫至元五年朝廷命帥會諸道兵攻取襄樊

為上流破竹之舉宣武備列戎行首建戍白議曰清澮
於漢宜亟據要害築堡戍使過宋人泝流以資寇盜不
然彼或先之豈惟奪志吾無如之何矣從之分兵壁其
會宋人為氣禡時餉道不繼行省以君有畫能幹即擬
克唐州新野等處提舉糧漕使消行岡阜間淺深不常
艱於綱運君遂捷數堰平水勢隨造江軸車餘千兩兼
速陸運復設防戍絕去涂梗舟車通便軍餉為不乏矣
樊城小而堅為襄之扞蔽省議取之翦其臂翼君率先

貌虎既登中流矢戰不輟丞相巴延公壯其勇止之以
勞宣授行省都鎮撫其職掌大槩上承大帥方畧指授
諸將諸軍有所闕白必因以上達與夫訓練調遣巡羅
等事皆所領治當時諸軍大小四十餘壁每翼鎮撫一
員號之曰接手日聽將令於都鎮撫武弁佩刀弭於雲
麾之下益肅如也其倚重比漢軍司馬唐都虞之任君
感其知遇誓以捐軀報國至元十年春二月襄州破第
功上聞至蒙弓矢鏐鞍繡衣之賜明年秋九月詔丞相

巴延等水陸並進鄂渚渡江師次郢宋人以艨艟鬪艦橫鎖漢面以扼之不克前責君辦之君按視對江堡北有枯河可三里許連接一湖湖匯於漢通君喜曰吾事濟矣遂挽舟由港中盡達於湖舳艫蔽江順流而東無復橫格之虞矣大為丞相嘉賞時主帥從偏裨百餘騎行視郢險天大霧不覺抵壁下彼潛出兵圍之數匝衆相顧失色君奮槊突擊殺數十人為解去因建言於相府曰郢據漢為池東南又有沙陽等城旁為犄角宜乘

銳先破之則郢乃孤矣。建其策，即命君督精甲潛往，不移蔭，掀沙揚石，掇新城，降沔陽而去。隨與諸軍併力破夏貴兵於陽灘堡，以清江道我師飛渡，駐軍武昌矣。時朝廷策諸將始加散秩，以功最授宣武將軍。師既東，前阻鄱湖風浪，君力督水師浮梁而濟，其敏捷赴功類如此。宋相賈似道罄國力結陣丁家洲，塞江路，誓與我師鏖決。丞相公命君督諸軍前陣，君鷹揚致師，出入行間，指授方畧，意甚暇也。一再合而宋人敗績，遂入建康。丞

相阿珠即分兵趣瓜步回擣維揚擇勇而有謀者皆往
君首膺其選丞相公皆不遣令將策勝一軍權克萬夫
長聞於朝其為二相倚重者若爾命未下竟以勤勞致
疾以是年夏五月歿金陵之軍幕得年三十有九丞相
公聞之驚悼以馬箠擊地有云亡誰繼之嘆遣屬將和
祐護其轡歸張君為人多鬚髯氣量宏事親孝撫諸弟
以愛與人交有終始不一言忘盡心所事國爾忘家若
飢渴之於飲食其趨事赴功臨機制變志慮出人意表

拊循士卒與同甘苦皆樂為之用故其燕趙勁氣所向披靡樹駿功為尤多初渡江凡軍中俘士人為獻者君與求親屬悉資遣之其或願留依庇者事甫定一皆縱還鄉里夫人房氏唐相國梁公裔內助有法配君德良稱先君歿生子男四人長曰用道嗣君職次用和用康用章女四人適名族繼室史氏太尉忠武公之次女生女寧哥孫男四人女孫三人贊曰張氏三世在野純積既久故所發攸厚若父鎮撫君起壠畝奮棘荆致身為偏

裨亦云顯矣其施若猶未也逮君遭乘機運奮發志勇
以投風雲之會惜乎功名垂就不享其報使英姿茂績
有鬱而未盡者今嗣侯以破靖江討江西逋寇等功進
武德將軍行軍總管風姿文雅延譽士大夫間殊藉藉
然益將行大遺澤而大其世業者耶用道與內弟闕游交
甚欵以家傳見屬遂直書其事至於筆削其間以俟夫
學春秋者焉

盧龍趙氏家傳

孟倅穆尋墜緒纘先猷特懇太史王惲通述一傳庶幾
溯川流而遠紹淵源溉根本而敷榮枝葉以衰謝辭者
再請彌堅謹按趙之得姓肇自周穆策造御勞胙土受
氏子孫蟬嫣代有聞人時邈譜逸蔑克倫次所可知者
當唐世遠祖諱少陽生子簡亮亮生元遂宦游於燕家
焉因為盧龍人遂生子思溫字文美姿英果拳勇絕人
尚氣任俠五代初燕帥劉仁恭壯其才武叙為偏將晉
王存勗來問罪公率所部挺身逆戰目中流矢為統帥

周德威所摧晉王聞其驤勇義而釋之數蒙指縱逮與
梁人戰於華野陷陣深入斬戮不勝計第功最加金紫
光祿大夫檢校尚書左僕射使持節平州諸軍事平州
刺史神冊二年遼太祖遣元帥擁大兵來攻城中糧盡
援絕公審形勢之攸歸察輿情之去就遂歛附太祖素
知其才勇可重任寵遇殊渥東伐渤海俾將全師充都
團練使既至旬餘率敢死士十餘輩突戰先登立拔其
城身被重傷太祖親調藥以敷之武帝即位論敵愾功加

檢校太保靜軍節度使天顯十一年石晉起義并門來求援因即命公出師風憲間掎角之敬塘賴以克濟加特進檢校太尉中書門下平章事燕京留守盧龍軍節度使管内觀察處置等使明年進階開府儀同三司兼侍中封天水郡開國侯食邑一千五百戶仍賜協謀靜亂翊聖功臣兼雲應朔奉聖等道採訪使時方兵後彫瘵未蘇政舉綱條惟從寬簡轉臨海軍節度使會同元年使晉行冊禮還檢校太師兼侍中進開國公加食邑

五百戶二年春有星隕於庭俄薄疾以三月廿日薨享年五十有八上聞震悼奠祭賻贈有加贈太師衛國公葬昌平縣五華山之陽敕集賢大學士張礪銘其神道公事親孝奉上忠出入行陳三十年大小百餘戰勲業烜赫身都將相備極人臣之貴而謙撝自牧退然若無能為者宜其以功名終初遼祖殂后述律氏智而忍悉召大將妻諭曰我今寡處汝等豈宜有夫復謂諸將曰可往從先帝於地下有過者多殺於木葉山墓隧中公

後以事忤后使送木葉山辭不行曰親寵莫后若何不
往曰子幼國疑未能也廼斷其一腕以送之直公而不
殺平昔守正不屈類如此配太原王氏贈鄭國太夫人
繼室清河夫人張氏陽翟夫人翟氏子十有一人長曰
延照永清軍節度使侍衛親軍事特進檢校太尉同
政事門下平章事開國公食邑一千五百戶賜號推忠
奉節毅勇功臣

十一世孫兩山北遼東
道廉訪使今居隰陵

次曰延祚燕京

留守檢校太師開國公食邑一千戶

十一世孫肱肥鄉
三務使今居燕十

三世孫天民遼陽省都都事今居平灤

曰延卿竭節匡邦保義功臣大同

軍節度使檢校太師開國公食邑一千戶曰延構供奉

官東西班都點檢曰延威推忠佐命翊贊功臣保靜軍

節度使特進校太師開國公食邑一千戶

十一世孫明今仕兩浙運

司知事

曰延晞飛龍院使檢校尚書左僕射曰延誨保靜

軍馬步軍都指揮使曰延光順義軍節度使曰延玉彰

國軍節度使曰延煦點檢曰延紹同州兵馬使曰延旭

內庫提點女十四人長適泰安州刺史傅知寶次適天

雄軍節度使檢校太尉兼侍中韓巨美次適弘農楊氏
次適竭誠奉國翊贊功臣東平軍節度使特進檢校太
師兼御史大夫上柱國南陽郡趙國公尚書令判三司
使韓德樞次適榆州刺史張彥英次適彭城劉氏次適
左林大將軍張美次適宣徽南院使天平軍節度使檢
校太師同政事門下平章事判三司韓勳次適清河張
氏次適博陵崔氏其開府太師衛國公第五子特進府
君即穆之十二世祖也葬建州永霸縣白羊峪有乾統

七年夫人馬氏所樹銘幢特進府君生二子曰主舜左
千牛衛大將軍生子四人曰匡禹臨海軍節度使生八
子第七子為翰仕至保遂州團練都統使始葬大興穴
窳別墅即睿智皇后賜田也生三子相之生五子第三
子消生六子第二子公為嗣兼管內觀察使一子鎔官
鎮國上將軍一子居常驃騎衛上將軍七世並襲遼世
爵相之府君弟進之永豐庫使尚之生子沿絕進之一
子漬寧昌軍節度使贈金吾衛上將軍三子仲曰公謹

龍虎衛上將軍靜江軍節度使四子孟曰興祥賢而多材仕金海陵世宗兩朝以德望門地致仕途顯赫官至開府儀同三司左宣徽使太子少傅申國公封鉅鹿郡王葬良鄉回城劉李里蔡家四迄今以趙大王墳目之翰林待制趙攄所撰神道碑在焉驃騎府君生五子曰柄天資孝友博學克守世範曰挺邃星歷術金初任靈臺司正郎曰機留心軒岐書伎精良選充尚醫侍宣宗官至保宜大夫曰梅善貨殖致屋潤積而能散貧乏者

多沾其惠興陵因游畋宿其家聞富而好禮賜銀燭盤
二鄉梓榮焉嘗監謝邛鎮酒曰植字景道穆之曾祖也
姿清淑有操行力學務為無所不窺工作詩嘗舉進士
不偶輒拂衣去易名質隱穴寫別墅教授為業別墅東
二里許即金建春離宮明昌間道陵春水過聞絃誦聲
幸其齋舍諷詠門間所題詩有折脚鐺中烹白薺打頭
屋底看青山者久之尋召至行殿賞其志趣不凡命之
以官固辭曰臣僻性野逸志在長林豐草金鑣玉絡非

所願樂況聖明在上容巢由為外臣可乎道陵益竒之
特賜田十頃復之終身士論烜燿自是不呼姓名皆曰
建春徵君號其鄉曰崇讓尊顯之也終於泰和二年三
月乙丑享年八十五配李氏生子孜司正府君之子曰
侃字和之穆之伯祖儀觀修偉學識通貫尤長於音律
儀制章宗時用闕閱子弟試太常禮樂科中承安二年
登歌甲首由是於禮樂愈覃精為專門之學矣積勞自
工師副正轉協律郎貞祐播遷禮樂散失不完命楊禮

部雲翼馬太博千里詳定府君以掌故得預節文所不
備條理之未暢資其論說補鑄為多累官定遠大將軍
大樂署直長權知太廟署事金末南遷校量鐘律獨黃
鐘抑而不揚既至汴林鐘復爾雖更鑄尚然竊自嘆曰
八音與政通陰陽消長所在可以卜時之治忽中興其
不竟乎既而金亡嘗會飲市樓樂甫作語所知曰革有
狼戾音即去之果有訇而鬪死者其沉機先識如此壬
辰北渡隱居鄉里未嘗一日忘其素業廼編集郊祀所

記憶者為祀典樂志辨凡三十卷或譏曰若子所學與時豈不背戾答曰文武迭用世道之常今向平治以是備他時求訪之具聞者嘆其資深而慮遠歲戊戌襲封衍聖公孔元措薦府君於朝攝大樂丞乘傳徧歷四方搜訪前代禮官樂師祭器圖集備預制作中統建元以來文物郁然君有力焉壽八十一卒時己未夏四月廿七日也配金吾李氏一子守忠正大間策論進士仕至承德郎管勾尚書省承發司前君歿娶王氏桑氏孫五

人柔原圭秀異曾孫繼祖榮祖興祖顯祖等八人曾女
孫十人玄孫男三人保宜府君之子曰璧字叔寶穆之
叔祖姿沉雄有才幹涉獵經史中武舉第官廣威將軍
宣宗麗妃位奉事卒於戊午歲九月十九日得年六十
五配史氏麗妃兄之女生三女俱適時族建春府君之
子孜字文玉穆之祖也資長厚耿介不妄交游學問淹
貫工辭翰藉門資調遵化三司使易代後僻居研窮理
學申明家法勉子孫興門戶為務自稱貽齋居士壽八

十五終於戊辰三月九日配良鄉李氏母儀婦道光範
中表生子鉉字仲器幼孤藉伯考定遠君翼誨及長雅
淡喜讀書不樂仕進邃易學好古多巧思音律占筮咸
詣其精妙太宮肇造鐘鼎祭器法物朝儀以先生家學
精思罕匹命之監視或以方伎上聞適營建新都俾灼
吉兆基命丕作蒙賜白金五十星重幣十襲相臣因欲
官之辭不可止其言人榮悴雖察五行盛衰必配合道
義廣示勸戒名公朝士歆其學識來質疑請益者無虛

日焚香煑茗間出三代鼎彝法書圖籍傳觀披玩論辯
皆有證據及談遼金故事揮麈緩頰使聽者忘倦慈祥
豈弟之色津津溢眉睫間有承平遺老氣象晚節號鈍
軒逸皓諸賢贈遺詩文無慮數百篇嘗於祖窳側構亭
為春秋奠祀所承旨王文忠公扁曰遺安樞相商左山
為之記其為名紳稱賞若爾今年登期頤康寧順適壽
祉未可量也娶李氏生子穆性純孝早傳家學善篆隸
以敏慧延譽搢紳間得從事翰林出倅孟州轉邢臺尹

超授承務中山府判官穆之子適祖述祖廸祖遵祖孫
遷安於戲趙氏自五季迄今三百餘年子孫蕃衍幾於
千人忠傳學繼世濟其美越不事宦游者學術行義亦
昭晰於時與韓劉馬共補為燕四大族至比唐李鄭崔
盧由開府太師衛國公忠毅奮發捐軀為國敦篤大本
君子之澤其流淵長亶其然乎推延威特進府君第五
房一傳而二再傳十二人三傳至廿八人四傳四十五
人五傳而六十四六傳八十四七傳九十二八傳當建

春府君行羣從數幾滿百本支子姪廿有八然遭壬辰
喪亂存者僅三人而已非賴穆之訪緝譜牒則後人無
由知其祖考之所自出宗系之所自分今復揚豐功之
盛烈發潛德之幽光傳載無遺垂鴻不朽俾趙氏來者
觀感景仰克念無忝是亦顯揚之一節也傳曰慎終追
遠民德歸厚矣又曰惟孝子善繼志述事若穆也可謂
有志追遠述事者也大德己亥秋七月翰林學士中奉
大夫知制誥同修國史王惲述

開府儀同三司中書左丞相忠武史公家傳

丞相史公天澤其先燕之永清人世以族茂財雄號農里著姓曾祖倫祖成珪繼有純德百年來潤涵淵寢滙而不發逮父尚書府君秉直讀書尚氣義為一方向服生三子天倪天安公其季也國朝癸酉歲冬十月太師穆呼哩以王爵帥天兵南畧中夏雷殛霆激震蕩無前府君審興運之會歸一羣疑之去就倡率義從降軍門王炤其誠數千人賴以生仍令府君統降主漕繼從王

攻北京下之以勞授行部尚書淵流騰盛千載之會實
開於此及金將武仙以真定降王命公兄天倪克河北
西路兵馬都元帥卽鎮守俾先貳焉時公年二十有三
身長八尺音吐鐘鉉然善騎射拳勇絕人屬橐鞬署帳
前總校明年乙酉春護母夫人北歸仙尋叛都帥遇害
府僚王縉王守道追公及燕曰變起倉猝部曲散走多
在近郊卽回旆當不招自至公毅然曰不共國之讎死
亦當往遂傾橐易伏南還以圖報復行次滿城得士馬

甚衆餘兵四集牙將毛等即推公攝行軍事遣監軍李伯祐言狀於王就請兵濟討即命公紹兄職仍以國將笑乃旱統精兵三千為援合勢進攻盧奴仙驍將葛鐵槍八主薄擁萬衆來抹公撤圍逆之奮先將士灑血馳戰呼聲殷地無不一當十葛氣褫會日暮退依泝水為阻公料其情歸敵必宵遁果然來之衆大潰生擒鐵槍資其器仗儲侍軍威大振遂下中山略無極拔趙州進駐野頭仙懼奔西山之抱犢砦其年夏六月復真定無

幾宋將彭義斌陰與仙合又圖竊取公同國將禦諸贊
皇扼仙軍不得進義贊勢蹙嬰火炎山自固主帥問計
於公曰賊衆山扼自陷圯地此易破也遂令監軍孫提
銳卒五千公略其後繼以鐵騎蹂之斬義贊戲下自是
義勇之名軒襍燕趙間後數月仙潛納謀者匿大厯寺
夜斬關為內應遂反其城公跳走藁守帥董俊以全軍
授公復與薩納台破走仙主帥忿民之反覆驅萬人出
將勦焉以示威公曰楚皆吾軍民我力不能及一旦委

去不幸為賊脅制今殺之何罪弗聽復力爭良久乃悟而全釋公乃繕城壁除武備明號令守禦以方為不可犯之計歲荒食艱捐甘苦與衆共之於是招流散拊瘡疾披荆榛掇瓦礫數年間官府及民聚以次完治然高公抱犢諸柵仙之巢穴也不即翦覆則終遺後患隨攻下之仙鼠竄而去繼又取相衛太宗即位公入覲朝議方選三大帥分統漢地兵上素聞公賢詔為左路萬戶以真定河間大名東平濟南隸焉庚寅冬圍武仙於沒

小大凡十餘壁金將哈達以衆十萬來援鋒始交不利
諸將乘虛一時奔北公獨以千人繞出敵後挺刃橫擊
敗一都尉軍既而復與大軍合攻仙逸去復取衛州明
年壬辰太宗由白波渡河詔公以兵由盟津會河南至
則睿宗皇帝已破哈達軍於三峯山乃命公略地京東
遂招降太康柘縣瓦岡睢州追殺守帥慶善努於楊邑
金主東播復自黃龍岡來襲我新衛公聞之輕騎馳赴
比至已合圍奮戈突抵城下呼守者韓帥曰汝等勉力

援兵繼來復躍出敵愕睨為披靡明日大軍至內外夾
擊敗走蒲城公尾其後金將巴哈所將兵尚八萬我殺
掠殆盡金主以單舸東保歸德公與階軍會睢陽同僚
薩吉斯欲薄城背水而營公曰若敵來犯我進退失據
此豈駐兵地耶公爭不下以其事赴汴比還全軍皆沒
其圍蔡也當懸瓠北面潛涉汝險出入壘中血戰者連
日蔡兵大衄汝水為不流金亡公還趙視師自己未版
籍後政煩賦重急於星火以民蕭條卒不易辦有司貸

賈胡子錢代輸積累倍稱謂之羊羔利歲月稍集驗籍
來徵民至賣田業鬻妻子有不能給者時兵民未分賦
役互重複遇征戍則趨辦一時中外騷屑殆不聊生公
憫詣闕併奏其事民債官為代償一本息而止軍則中
戶克籍其征賦差貧富為定額上皆從之布告諸路永
為定制迨戊戌己亥間仍歲蝗旱復假貸以足貢數積
銀至萬三千餘鉅公度民不可重困乃先出其家貲次
及族屬官吏均配以償遂折其券監郡蒙古薩里以國

兵鄂羅數萬以散處州郡間營帳所在大致騷擾伐桑
蹂稼生意惻然公騰奏太后悉徙居嶺北由是軍民肩
息田里遂有生之樂迄今真定兵甲民數勝於他郡由
公牧養其根本故也國朝自金亡以來歲有事於宋公
未嘗不在戎行棗陽之役城小而堅主帥忿其攻久不
拔命徑乘其城公率馮程二邑圖爾國語謂勇曰巴圖爾先諸將
登太子庫楚壯其勇惜其材傳呼止之公戰愈力克焉
其攻襄陽也宋以舟師數千陳峭石灘犄角以綴我肘

太子以城不易拔可趣利舟楫命公往以陳瞿二校自翼驅猛士兩舸直前擣之彼氣既奪奪槩盪決覆溺者萬計獲馬及取光化復列紼首上立陷其城復州之役敵盛以鬪艦三千艘鎖湖面為柵公進說曰柵破則鎖當自潰遂募勇敢士四十輩親鼓而前壞蕩無遺復懼而降其攻壽春也公獨當一面宋人以我圍遠勢分緩急首尾莫應賊乘夜果來斫營公單騎逆戰手格殺數人戲下繼至悉驅賊入淮水至於掀滁州蹂盱眙掇寶

應瀕江渚且破且降者二十餘所雖會諸道兵共事其
伐謀制勝敵愾樹功未嘗不在羣帥之右及策勲盟府
推讓行間雖寸長不掩故諸將屈盡其智能士卒樂出
死力論者謂公智信仁勇堂堂有古良將風士子歲公
入覲憲宗察其忠勤特加顯異遂以衛五城封公為封
邑方今聖上龍潛即知河南困敝請分治培植為異日包
舉殘闕之本許焉遂以公充經畧使公以河外虛耗日久
封永存食於內邊寇日侵於外非大興祓濯則不可去

之舉賢能汰冗濫抑豪強均賦役信賞明罰訓農勸兵
列堡戍以絕寇衝實屯廩以給邊餉凡政之不便及民
所欲而未得者率更張而立行之睢州長楊興封丘簿
董極橫恣不法暴其惡肆諸市萬口稱快明日閭閻間
有畫公像者不二三年方數千里之間行於野民安其
樂郊出於塗商免其露處觀善俗既庶而有教察軍志
則又知夫怯私鬪勇公戰威行惠布陽開陰肅內外修
治略無遺策河流遠潤衛亦復承平之舊宋人為榮其

北門矣丁巳春詔左丞相阿勒格爾勾較諸路財賦性苛刻鍛鍊羅織轉功為罪上下例遭凌辱公以勲舊獨見容假公請曰經略事我實主治是非功過理當我責今舍焉而罪餘人心何能安怒叱其去公不為動堅請者數四用是翼蔽頓釋者甚衆戊午秋扈憲宗西征明年夏駐合州之釣魚山秋疫作方議回鑾宋將呂文德率艨艟千餘蔽嘉陵江來犯逆戰不利上命公禦之乃分軍為兩翼跨江列陣文德軍至截流縱擊斂鉅艦數

百艘追至重慶三戰三捷遂班師而還又明年庚申夏
六月是為中統元年皇帝御極首問公治國安民之道
遂具疏以聞皆時所急務上嘉納之旋命公撤江上軍
還授河南等路宣撫使兼江淮諸翼軍馬經畧使制辭
有史天澤自太祖皇帝命穆呼哩國王開拓漢地卿兄
有佐命殊勲又扈從朕之父兄勤勞王事文經武略於
國有功綏撫河南民懷惠愛有功高心小夷險不移之
旨明年夏五月由江淮經畧使進拜中書右丞相公既

秉鈞衡細大之務知無不為然言必慮其所終行必稽其所敝不強時之不能不禁民之必犯體時順勢通變制宜於是清中書以正紀綱分六部以綜名實設撫司以肅州郡退貪殘以簡賢能需恩澤以安反側頒祿秩以養廉節禁賄賂以絕倖門又定省規十條董正其機務憲宗初年括戶餘百萬至是諸色占役者強半悉奏還為民籍以紓疲瘵論思之際處國相儒臣間調諧彌縫必使情通理得期於事集功成澤被生民而已自是

上下交孚帝載熙緝中書無留務矣故中統初元文物
休明階太平之治者公之力為居多秋九月扈從北征
次昔木上與額埒布格遇命沁津為右軍公為左軍仍
合大勢蹙之北兵潰遁三年春瓊賊陰結宋人以並都
叛上命親王哈必齊總兵討之亮勢張甚詔公往視聞
瓊入據濟南公曰狶突入豈無能為也至則進說於王
曰瓊多譎而兵練不宜力角當以歲月斃之遂環以深
溝高壘奔軼應援之計畧不能肆四月軍潰出降生擒

壇公力主斬於軍門誅同惡者數十餘人悉縱歸傳檄東下為壇守者皆降及陛見悉歸功諸將乃以擅殺自劾上察公忠誠亦不之罪初臨軒授鉞付公顯征諸將皆聽節制迨卒事未嘗以詔旨示人三齊平首奏兵民之權不可併居一門行之請自臣家始史氏子弟即日皆解紱而退初公既相即辭其封邑凡三請乃許其謙遜密勿類如此至元改元加光祿大夫中書右丞相如故三年皇太子燕王領中書兼判樞密院以公為左丞

相樞密副使遂議建三衛及留兵寓農之策不二三年
國容軍實蔚然可觀六年朝廷營取襄漢詔公與駙馬
呼剌珠往經畫之賜金駱甚渥至則相要害起一字城
聯亘諸堡貯兵儲絕聲援示以久駐必取之基而繼以
疾還明年進開府儀同三司平章軍國重事仍令右丞
相安圖諭旨曰中書省尚書省樞密院御史臺或一月
或決旬大事卿可商議小事不煩卿也十年宋將呂文
煥以襄陽內附聖天子赫然有掃清六合混一車書之

意明年秋與右丞相巴延總大軍行臺荊湖自襄州水
陸並進趣鄂渚渡江中道病不能進上聞遣使賜葡萄
酒勞公仍慰諭曰卿自朕祖宗以來躬環甲冑跋履山
川宣力者多矣又卿首事南伐異日功成皆卿力也勿
以小疾阻行便為憂勞可且北歸善自調護公還真定
上又遣其子杠與尚醫馳視及賜參糖等物因附奏曰
臣大限有終死不足惜第請天兵渡江以殺掠為戒言
訖而薨略不及其家事年七十有四訃聞上深震悼遣

近侍致奠賻白金若干贈太尉諡曰忠武仍勅辭臣製
碑表其勲德公忠亮有大節出入將相近五十年其元
勲碩德柱石四朝師表百辟殆古社稷臣而氣貌循循
若無所為者及臨大事論大政夷大難毅然以天下之
重自任要以竭忠徇國尊主庇民為心一以至誠將之
其視富貴權勢斂然畏遠若將有浼於已者其善始令
終世擬之郭汾陽而氣量涵宏識慮明哲又根於天性
粹然故累朝賞公忠勤龍光稠疊前後賜賚不可殫紀

公初進大拜制下之日朝野交慶公門閤蕭然若無所
事有面說公以威權自張者公因舉唐周墀為相問於
韋澳曰力小任重何以能濟澳曰願相公無權墀愕然
不知所謂澳曰爵祿刑賞與天下共之何權之有又曰
某緣汗馬頗著微勞餘將何有今眷倚如此正以軍國
事體猥多厯練老夫有通譯其間為諸公調達耳相則
吾何敢當言者悚服而退至於開誠心布公道集衆思
廣忠並用人齊家訓教子姪又有大過人者當歸德城

潰脫李大節於白月俾參幕謀留務無巨細一以委之
參卿王昌齡代公治衛亦以聽其注措其裨贊籌畫則
王守道納哈塔松年四人推誠委寄雖骨肉莫能間故真
定治效高視他郡四方為之訓北渡後名士多流寓失
所知公好賢樂善偕來游依若王濬南元遺山李敬齋
白樞判曹南湖劉房山段繼昌徒單顥軒為料其生理
賓禮甚厚暇則與之講究經史推明治道其張頤齋陳
之綱楊西庵張條山孫議事擢府薦達至光顯云初武

仙既害都帥公紹其職及兄子揖長即奏牘於朝曰臣始遭家難黽勉承之以雪讎恥今姪揖等皆可勝任願以職歸之畢臣宿志太宗曰但聞爭官者多讓職者鮮卿之此舉殊可嘉尚朕自有官俾之即詔揖為真定路兵馬都總管後又奏次姪權克唐鄧軍萬戶公因以疾乞退曰臣無大功報國一家處三要職恩寵踰等敢昧死固請上曰卿奕世忠勤有勞於國一門三職何愧何嫌竟不允憲宗駐六盤也詔發民為兵勅使擬公子為

帥公曰吾昆弟三人大兄之子俱顯仲之子未也幸先
之使者嘆服竟以姪子樞克新軍萬戶初總衛鈞魚也
有邊將富察琚者隸焉日有言偃蹇不為愜公含容之
明年渾都海平行臺上功相府獨琚名闕公問焉或以
前事對公曰聞平夷隴右若功最多其可後哉即命具
完文以進遂均賞賚其忘過記功又如此嘗集子姪輩
戒之曰史氏起龍幹際風雲德涼效薄今身名顯赫宗
族昌熾如是何以答乾坤大造累朝之恩私乎若以王

事歿邊裹馬革歸葬吾素願也汝等異時策名委質盡忠所事以圖報國又曰惟孝與義可有立於代汝等謹服此訓苟違吾言與暴君丘墓等爾公年四十始折節讀書酷嗜資治通鑑真積力久義精理貫諷誦略皆上口至成敗是非徃徃立論出人意表雖老師宿儒有不加詳者至矢謀廟堂運籌戎幄良法美意契合融會見諸行事者誠無愧於古人云八子格中書右丞樟前新軍萬戶棣中山知府扛提刑按察使杞前衛輝路總管

梓澧州路同知楷終南陽府同知彬御史中丞孫男一
十六人不肖惇猥登公門者有年及與諸子游故聞公
言行頗詳以家傳屬筆故勉為撰述異時太史氏勒元
勲於帝籍贊畫像於凌烟庶幾有所考焉贊曰忠武公
當草昧患難之際憤發義勇收合散亡卒之芟羣雄定
河朔開國承家光昭父兄遺業其功烈已不世出然一
時佐命儼景同翻者多矣惟公厯事四朝恩遇眷倚始
終不少哀復能斂百戰之威雍容廊廟以道事君為時

賢相高名完節爛然獨著福祿永終慶流後裔豈偶然
致哉蓋由勲德兼備忠智兩全君臣之間有以感召故
也若祇以遭際期運依乘風雲論之是豈真知公者哉
故推生平行已大節為後來之法云



秋澗集卷四十八

欽定四庫全書

集部

秋澗集卷

四十九
五十五

詳校官侍讀學士臣沈咸熙

侍讀臣孫球覆勘

總校官降調編修臣倉聖脉

校對官編修臣于鼎

謄錄監生臣應台

欽定四庫全書

秋澗集卷四十九

元 王惲 撰

傳

蘇門林氏家傳

林氏其先兗州曲阜人唐季有官閩中者後復徙家文
登至遠祖府君翰蓋五世矣翰宋初用子貴贈率府率子
諱文受知熙陵官至崇儀副使淮南路提撫刑獄贈領

軍衛將軍生子永終屯田員外郎御史臺推直官累階
贈光祿卿永生之純字嘉父擢景祐五年進士第釋褐
主朝城簿河東犯橫隴瀕於不支歸兵恟恟欲亡去公
安諭遂帖然事集升知莘縣以屏盜有方受澶州頓丘
令未幾恩信大行時麥黃水盛下齧孫陳闕岸勢危甚
公朝服立潰堤上望濤頭拜禱波神為霽威境賴以安
改佐著作淮陽軍事判官貳徐惠劾紀著叛獄有匿其
家闕者註誤殊衆公為辦理多致原釋郊禮覃慶加太

常博士知大名縣初天王院五代時有韓王賜田甚廣
歲久失據鄰伍以僧妄冒致訟累寒暑不能決公按索
隣券考明封畔繼得古石記與所按吻合以田付僧令
歲輸常賦民乃稱服用丞相程公薦通判青州終得年
四十有九官至職方員外郎上騎都尉仍賜五品命服
娶呂氏封京兆縣君惠和宜家之純生三子長曰舍字
虛白年十九擢熙寧進士第性恬退以高節自信嘗有
詩云世有非常樂人無未老閒未三十以大理評事休

官名賢高其行至方之淵明初先生西遊共城愛其山水明秀迺營葬青州府君於縣西處賢鄉古郭里母夫人呂氏祔焉自是林氏為衛之蘇門人先生四子曰愚曰恕曰憊曰惹愚字貢元亦以節行稱宋亡至焚香告誓不仕而終仲弟介鄉貢進士季弟會字貫道幼知嗜書剛正有志操由蔭補郊社齋郎初主成都雙流縣簿令久闕攝公行縣事有能聲部內舊有堰歲例役並水民苴治貧下苦之公乃一責資溉家理辦仍隸石代工

衆免告勞頻歲大稔調宿州司理叅軍暮夜民遺火延
燒犴屋公出繫散置庭中比熄倉卒際無越逸者上官
材之移南京軍巡判官民有戕其子執謀害人者按竟
公至疑焉求情得白遂直其枉改新蔡令歲大蝗獨不
入縣境人謂公廉平所致由韋城宰歷奉符縣秩滿授
通直郎知蘇州常熟縣兩浙頻年大水引溉浦口湮闕
無慮三十餘所累政謾不加省公按行故瀆率疏濬之
民受賜不貲元祐庚辰疾終蘇之公館配張氏有淑德

駕部員外郎赤之女封壽安縣君生子男四人聽通直
郎西京敦宗院博士聰總隱皆業進士自羈闕至成人
太孺人陰教為居多聽生子五人曰巽兄蒙鼎華巽次子
諱正國字德將登金大定十六年進士第終少中大夫
北京監使生懷遠大將軍毗陽丞諱茂字漢卿懷遠二
子曰思敬鄉貢進士曰思德潁州軍仗庫使生子芳今
任江南某府從事思敬府君之子即故衛州交鈔規措
大使諱通字子泉為人丰儀修整顏渥丹鼻隆然如膽

垂寡言笑善心計顧衛南北衝會貨財四通遂積殖與
時遂然坐籌能擇人而任故物情得而掇世資生平喜
賓客樂施予其克勤躬儉殆憂深思遠者屢以其術事
上官獲精幹稱嘗訓子珪曰林氏上世以詩禮傳家代
有間人子惟早失怙恃生長喪亂間以餬口計處四民
末業致貽祖禰羞諸孫稍長無忘讀書以復世範汝念
茲無置府君以丙辰歲終魚行里之私居壽六十三配
宣氏衛之大家主治內務寬儉有母儀燕處榮養期頤

而終享年八十有三人以全福歸之子珪以孝義著稱
能世其父業嘗任州三務大使次子璋謹愿克家珪子
永大名府平準庫使次子元珪奉遵先訓俾之從學其
資藉啟迪乃心罔不盡不數年起家為中書掾至元丁
丑予列職太史元來謁拜而請曰元無所肖似析薪之
責固不克負荷惟是先世行業非得名筆約而暢之將
不能傳遠而人見於後先生尚胥暨顧予以林世叙雖
邈其間而知之見而知之者班班可紀加以世姻之好

故勉為傳述之贊曰

林氏本出商姓太丁子比干以忠諫死嗣堅逃難長林
山易以定氏周衰枝葉扶蘇散處中國如放之間於魯
顏之顯於齊回以義著至以相名皆其後也繫南安之
林唐已來世為魯人豈放之苗裔耶迨唐歷宋金四百
餘載間奕葉以儒顯其流風善政表表于時者如是迨
規措府君遭時艱虞家世中衰竟能適追來孝俾盛德
幽光墜而復續豈君子之澤其流淵且長乎

南鄭王氏家傳

王氏皆王者之後春秋時王子成父者敗敵有功因賜氏厥後子孫散落中國在晉者靈王太子後齊則畢公高後其在陳留者齊王和之裔汲郡王氏其先陳留陽武縣七圜里人起家壠畝耕稼河陂間宋靖康初避地徙家衛汲縣長樂鄉之白楊里遠祖金天會間積勞至杞縣尉高祖兄弟五人二翁者是為扈王氏初妣父扈素長者聞高祖賢舍而甥焉生子男五曰三翁四翁五

翁十五翁十六翁人見其本支蕃衍稱扈王氏以別因之益不忘本也三翁贊譜叙為二代祖生二子曰元用曰仲英仲英資穎異是為惲高祖自田舍即改肄士業嘗語人曰終當以筆代耕衆異其言及長補郡掾為人英特棣棣有威儀主治曹務踣勅角切厲風發明昌初節鎮叅佐例朝授用薦者言遷河平軍都目官上官倚重有黑王殿直立節度之目尋得暴疾卒魚行里舍時年三十有八人惜其年不稱德生經紀紳三子紀為決曹紳潛德不耀

曾祖經字伯常天稟孝愛垂髫已知事母容止如成人
禮氣方嚴內長厚喜施與志不樂祿仕雍容鄉閭以德
度靄一時昆仲七人同居內外無間言以累葉不分家
用饒足其賑貧施乏不掩為偏惠人有貸弗忍徵久不
克償輒折其券或來謝就復惠濟曰周急素所樂何謝
為一田家子要紫大條來取所附緡經以醕繫直弗與
徐誠之曰農當務實士君子帶非汝當繫悉所有送其
家女弟嫁陵氏壻下以俠犯法公曰王氏世鮮女妹先

君所鍾愛若壻置於辟婦能免累吏捕急竟容匿會赦
嘗出郭門遇里農易菜歸公曰農圃吾事也情焉取諸
市可乎其人謝而去鄉黨有訟者不之官府來求剖正
為諭之曰遠親莫若邇鄰同居雜處世所未免親仁和
隣古之善道初無大故何至是哉君子愛人以德曲直
非所辯曰吾儕小人間公言敢不易慮至相戒曰今而
後不可使長者復覩吾面顏其為一邦聽直欽服如此
王氏北渡後可支分派別者尚十餘房其親喪隨所寓

權厝曾之上世亦殯是晉村之南阜曾慮歷年久命封馬鬣漫不可識歎曰吾大宗子合食族墓責實在我遂起新阡大葬於長樂鄉第四疇祖業之北原及舉祀絕者廿餘柩贈賻率有加凡內外男女孤惻無籍賴者為娶嫁之姻禮踰已出曾祖妣系出新中臨清關宋汲郡公呂氏之裔壺儀母德宗屬仰法焉生與曾祖歲月日同北兵破衛亦同時怖沒於家春秋七十有六寶貞祐二年甲戌春正月十一日也百年來里中宿耆談孝愛

而內有則者必曾為稱首生祖字彥字身長七尺二寸儀觀清淑少傳家學尤明習文法至帖問條對義精理當筆洒洒無滯辭行輩無居其右者甫冠遭罹板蕩世業為一空奮身從事卒不失舊物雅為節度公完顏從坦所知遇由郡掾辟刑曹孔目官祖盡心庶獄要本情與法應未嘗用察為明情得為喜也故郡中稱平至有哀矜折獄之譽類注刑統進祿等書既而嘆曰後世知我罪我其此書乎生平樂誨人怡顏和氣不以已長

格物雖童孺質問諄諄然無倦色有弗知未始不盡也
今梁衛間由吏業而上達者半為門生遂以吏學授先
君曰吾治獄平後當有顯者然前賢有言吏以法令為
師問而可知其能與否自有資才非學而可此汝最當
默識弟完之子鈞早失怙恃鞠育與先君等至一豆羹
一裘褐必加顧恤正大改元四月十六日以末疾終新
衛州橫堤里之寓館壽五十有一官至敦武校尉祖妣
孟氏女縣南草市榆林坊富家姿貞順配祖德良稱既

誕先考以貞祐二年癸酉四月十六日卒於郡之故家
再娶韓氏韓宋已來世顯族有累階至司空龍圖者二
十九處寡以儉烈聞流寓勤苦保持門戶甚力俾先君
卓爾早達祖妣資藉之方為多晚嗜道家教號妙清大
元中統庚申重九日以疾終安仁里享年七十有六越
三日祔葬玄堂祖柩之左先君諱天鐸字振之姿精敏
幼知嗜學諸弟出遊嬉獨把書不置既通大義先祖以
律學授之即能下筆條對明究情法日嶄然露頭角衆

謂能大其先業元光初溫國胥公自秦移鎮新衛尚書
李特立聞其才由州戶曹掾辟權行部令史時上以御
馬賜國公圍曹取芻粟比內殿例先君曰不可在閑則
路馬既賜則公乘內殿之例容得同乎公聞之曰王掾
愛人以禮二年上黨公闔壁馬武京為河朔藩扞分羸
兵四千人假食於胙適公儲亦無幾方風雪寒沍衆待
哺閭井間公府議省以聞先君進說曰張糾合義兵皆
河北遺黎今飢若是不權宜以濟殆非從便副上官意

也侍郎梁亨道為肯首然當若何曰今官義兩軍溫飽
有日若以月給權輟半以應彼急河南漕粟計不時亦
至如此則客主兩不失所行臺可其請孱兵賴以安活
自是大為省叅康瑋即中盧芝

塘字良輔芝字建瑞二人號載吏事所賞

識曰會是驥足騰驤一日千里也正大四年用元帥完

顏公

名額爾克得賊字火燎之號火燎

薦拔所能試京師擢吏員甲首

時年二十有六方軍國多故財賦一仰都運司經度實
擇才掾集事即選充運司掾長先君夙夜在公游刃餘

裕都漕李公芳

字執剛承安二年進士號精政務

同漕伊喇鄂和爾深加

器重

鄂和爾公字景先亦蒙官

入作司藏吏以計盜官物使高世英

受贓初不知從來事覺吏逃失所在及科罪從事帥肅

執以監主為罪首抵世英死先君爭之不下至詣憲部

詰辯曰原世英情本非同謀第行盜後受賕耳據法議

罪與原謀共犯不同高止合坐贓論且法者固當公共

師舍焉以即汝心是置法為虛器上官避之高竟減死

論後懷金來謁先君怒斥去曰毋污墨我所爭者法非

汝私也豐行庫使劉濬

字德源愛民榜進士先
君嘗從問學以卒初業以沿代

不審陷名紙三十萬用是追解先君為申理復官如初
五年補睦親府掾屬皇兄荆王判府事愛其德度深加
禮遇明年秋皇太后崩制袒免親奔訃有遠邇之限違
者從府科罪時有後期者先君請曰南渡來宗室播弱
宜從寬宥王然之以為知體園陵禮畢卒無有被劾者
六年轉補戶部令史時簿書財賦委積音積紛至先君精
力過人故務愈繁志愈明氣愈厲事愈詳不煩書佐裁

決如流於是風動臺省有快吏元康之譽開興初用入粟例補滿授戶部主事壬辰天興東狩崔黨往往入宮禁竊取金貝或堅約同往以遜辭免乃竊嘆曰端門不忍過其忍聞此京城下將士爭入俘掠尋有令禁止先君偕同志者突冒兵威褫救百餘口於南熏門下乙未歲北還淇上尋朝廷命斷事官耶律瑪魯公括諸道口柄用顯決得人為意用薦者署行臺從事戶制以籍為定互占它縣以死論有潞民馬醫常氏避役匿河內

王帥家事露公抵常以死意在籍沒州將且用聳動隣
道先君辯之曰常罪止於逋論死則非制書本意公怒
曰脫有誤並汝坐之反復辯明常竟獲免又王鳳翔者
告崔帥立弟益侃匿金國珍寶適萬戶喊失納國闕人
受誅公抵益等以喊失罪罪之先君曰初謀竊者崔立
今已死況罪不相及國有常憲公遂平反為出益等至
有圖像奉報之語明年秋耶律公薨雲中遂南歸或勸
為郡縣曰一丘之木安足棲集書歸去來辭於齋壁

以見意因號思淵老人日以經史自娛尤嗜春秋左氏

傳西漢書晚年一洗心於易嘗質問於華陰王先生

名元

禮天厯進士
第號玉華子

曰子學有素吾試先汝問自昔治少亂多

君子寡小人衆何也先君曰豈非天一而地二乾陽方
始而陰已為之倍歟玉華曰子得之矣集歷代諸儒易
說為一書題曰王氏易纂遇朔例一占玩辭明變其應
如響下至天文陰陽皇極等學皆通習之間一異書輒
自手錄多積至千餘卷友人劉冲曰何矻矻如是曰吾

老矣為子孫計耳歲戊戌詔試儒士時恩制寬或以乃
嗣長可從師往試先君曰吾思以義方為訓若以幸竊非
常恩非所敢聞嘗誦憚忱曰吾已錯斷不容再寒殍死
無吏習能一志於道以儒素起家吾歿則瞑目矣然學
貴專精汝不見鑑瑩則乃能別物學苟不精如治鑑不
明將安用為不學易昧涉世之道不讀麟經無以知筆
削之正吾平昔行已得乎此而已丁巳秋八月以疾終
牖下先君資剛明簡重善持論慮惠深雅以大用自期

人亦以此與之握瑜懷瑾羣而不矜事莫可措手者率
優為之不聲色少動故官守宦游莫不尊德樂道問政
質疑取決而去事已率如教至吏筆縱橫緣以儒術乃
餘事耳又善尺牘作真行書勁韻有風格與人交以取
容阿匿為恥居家寡言笑以身為律度人望而畏若一
官府然外事緩急不一言及家人非疾卧未嘗見日而
作三十年兩易裘褐年四十六既奪先妣或勸再娶曰
其如不可何老者繼室又先余死是轉余於恤少者後

予是吾遺累於後竟不娶初試京師時宿院夜夢人奉一首加胄曰持此若各也及榜出擢甲首云歲丙辰秋憚亦夢人馳報曰汝父領朝拜且至趣出顧見先君朝服席帽秉而秉簡一卒跳梁馬首唱名翠微君節度使後三日先君遘疾乃以所夢上白曰翠微者太虛之氣夫精氣為物遊魂為變死生者晝夜之道吾固安之復何憂與明年捐館吁亦異哉先妣靳氏相州永和鎮人進士子玄之孫安陽丞顯思之女性淑善於婦道良謹生

二子曰憚曰忱孫振孫宜孫重孫鞬郎贊曰

謹按家譜憚六代祖昆弟五人五代祖行一十三高祖行一十五曾祖行一十九王父行一十四禰伯叔行六人由是而觀金百年間本支不為微眇然自喪亂來或四三世五六世而已者凡二十有四房哀哉唯扈王氏暨相之醫傳房歷八世而傳祀是豈偶然者哉憚觀西漢名臣往往決曹獄史致位槐棘雖云明習文法練達故實至論身名烜赫後裔延昌必曰陰積所致王氏自

河平府君而下累葉以力穡承家職司城旦追先考而
業有光子孫迄綿綿於今視履考祥其亦有足致然者
邪

烈婦胡氏傳

劉平妻胡氏濱州渤海縣秦臺鄉田家子至元閏年平
挈胡洎二子南戍棗陽垂至宿沙河岸次夜有虎號然
突來啞平左髀曳之而去胡即抽裝刀前追可十許步
及之徑刺虎劃腸而出斃焉呼夫猶生曰可忍死去此

若他虎復來奈何委裝車遂扶平攜幼涉水而西黎明
及季陽堡訴於戍長趙侯焉掾藥之軍中聚觀哀平之
不幸咤胡之勇烈也信宿平以傷死趙移其事上聞得
復役終身嘻胡柔懦者也非不懼獸之殘酷正以援夫
之氣激於衷而知有夫不知有於菟也平雖死其志烈
甚矣方之太山號婦何壯毅哉贊曰

桓桓壯夫驚勇而大事出倉猝變色蜂蠆烈烈胡氏憤
物為害義激柔衷氣薄於外視虎如鼠所天為大平雖

陞死婦節則邁媛折熊衝蘊刃賊輩彤管流徽清芬匪代

員先生傳

員炎字善卿固州人性落魄嗜酒業詩有能聲不事生產大元乙亥歲故人楊紫陽主漕洛帥愍其寔用監嵩州酒時兵後邑居榛荒日與鹿豕伍非所樂也已而隨所徵上謁楊方據按坐堂上吏鳧雁行立員挂布囊腹下杖巨槌直前曰楊使君不相知置我於此幾為老罷

所噬此汝酤鉏持取吾不能為汝再辱遂揖而去其疏
誕如此自是長遊河朔以詩鳴諸公間其洛陽懷古分
韻得髮字云東維打空城北邛連廢闕懷古動悲吟遠
客生華髮隆德宮云林花細妥胭脂色水荇輕淤翡翠
泥歌舞留連嫌晝短樓臺縹緲覺天低讌集東平湖亭
北海樽前人似玉東原城下水如天滿眼荷花三百頃
採蓮人語隔秋烟高唐道中影孤海內干戈滿愁入天
涯草樹低桑柘影空蠶已老陂塘涸盡燕無泥濟南金

線宿雨乍收雲葉斷猶疑電影掣湖心扇尾羊云馮翊
春草香芊綿柔毛食飽飲苦泉卧沙稀肋瓊筋細帶霜
小耳春繭圓扇尾一方移種類風頭萬里搖腥膻吾生
本無食肉相不煩浼予愁烹煎馬酮云漫說十杯不醉
人清光壓倒洞庭春攜行何用紫絲絡渴飲不煩烏角
巾搖動革囊成醞釀封藏花盜作逡巡坐中一混華夷
俗或有豪吞似伯倫予時能憶者止此西歸過衛先君
館馬褐衣麻屨酒近酣巨挺權膝上掉頭吟諷歌謠慷

慨之氣軒軼四座素不能騎衆人強之輒色變墮地或以詩戲云靴有銕青雖可愛面無人色實堪吟嘗懷金一餅曰鎮心不可以闕此後用以易妾繼為人竊去家居壁四立餘詩橐酒瓢而已復有撤舉字彥舉亦陝人面黧慘目光

闕

憑者少為里嗇夫初不解文

字一日忽能作詩吐奇怪語皆古人所未經道雖苦無義意其豪侈之況儕輩屬和終不能及中元冬見予於燕市酒樓浮大白數行徑出步爐間嚶嚶然忽作露蛸

跋

來扼余腕忻甚曰吾有以贈子其詩有氣凌太
華五千仞詩繞國風三百篇之句醺酣中惜不全憶也
嘗謁得楮幣若干醉過里井即投其中曰為爾俾予區
區若此奚用為其狂易如是後客死保塞殯西南門外
路北若干步揭曰詩人撤某墓詩三卷號極谷道人集
好事者刊行於世

墓誌銘

金故忠顯校尉尚書戶部主事先考府君墓誌

銘

先府君諱天鐸字振之族王氏其先陳留郡陽武縣七
圜里農家避靖康亂徙居衛汲縣長樂鄉遠祖有積勞
官杞縣尉者曾祖府君諱仲英特有威望終河平軍節
度府都目官祖諱經未仕天性孝愛鄉黨化其德顯考
府君諱宇衛州刑曹孔目官精明文法表表為吏學師
官至敦武校尉先君少聰敏嗜學不為羣兒嬉讀書通
大義先祖授以律學即能下筆論斷推原情法閭閻如

老成人衆謂父良為教子能世其家矣正大初自州戶
徵辟權行部令史時哀宗以御馬賜行省英公圍曹取
芻粟欲內殿例同先君曰在閑則路馬既賜則公乘內
駟之例非所敢知公聞之喜曰王掾愛人以德矣上黨
公闔壁馬武京為河朔聲援以餽餉不繼間羸卒四千
假食於昨適公儲亦無幾部議以省聞方風雪寒沍衆
待哺閭井間先君進說曰公府糾合兵力皆河北遺黎
今飢若是不權宜以濟殆非從便副上官意也侍郎梁

亨道為肯首然當若何曰今官義兩軍溫飫有素若以月給權輟半以應彼急河南漕粟計不時至如此則客主兩不失所可其請孱戍賴以安活自是為省叅康瑋郎中盧芝所器識曰會見駿足騰驤一日千里也正大四年用元帥完顏公薦拔所能試京師擢吏員甲首時年廿有六方軍國多故經費一仰大農調度即選充運司案長時李乾州芳

承安二年進士字執剛

伊喇鄂和爾領漕計號

精吏務先君夙夜盡公審會明當二公稱其能入作司

吏以計盜官物使高世英受贓初不知所從來事覺吏
逃失所在及科罪從事帥肅執監主為首抵世英死先
君爭之不下至詣憲部詰辯曰原世英情本非同謀第
行盜後受贓耳據法議罪與元謀共犯不同高止合坐
贓論且法者固當公共師舍焉以即汝心是置法為虛
器上官黷之高竟減死論後懷金來謁先君怒斥去曰
毋污墨我所爭者法非汝私也豐衍庫使進士劉濬以
沿代不審陷良紙三十萬是用追解先君為伸理復官

如初五年補睦親府掾屬皇兄荆王判府事愛其德度
深加禮遇明年秋皇太后崩制袒免親奔赴有遠邇限
違者從府科罪時有後期者先君請曰南渡來宗室播
弱宜從寬宥王然之以為知體園陵禮畢卒無有被劾
者六年轉補戶部令史時簿書財賦委積音積紛至先君
精力過人故務愈繁志愈明氣愈厲事愈詳不煩書佐
裁決如流於是風動臺省有快吏元康之譽開興初用
入粟補滿授戶部主事壬辰天興東狩京城下將士爭

入俘掠尋有令約束先君偕同志者突冒兵威褫救百
餘口於南薰門下既而北還鄉里乙未歲朝廷遣斷事
官耶律公括諸道戶口柄用端決得人為急前省掾李
禎已佐幕府薦先君於公曰王某予弗及也遂署行臺
從事戶制以籍為定亘占他縣者以死論有潞民馬醫
常氏避役匿河內王帥家帥名資榮事露公抵常以死意在
籍沒州將用聳動隣道先君辨之曰常罪止於逋論死
非制書本意公怒曰脫有誤並汝坐之反復辨明常竟

獲免明年秋瑪魯公薨雲中南歸讀書養晦以厚所待
或勸治生曰非予初心也勸仕州郡曰一丘之木安足
棲集日以經史自娛尤嗜春秋左氏傳西漢書其天文
術數等學皆通習之年既加一洗心於易嘗質問於玉

華子

先生名元禮華
陰人天歷進士

大有所得一日先生發問曰自昔

治少亂多君子寡小人衆何也先君曰豈非天一而地
二乾陽方始而陰已為之倍歟玉華子曰子得之矣集
歷代易說為一書題曰王氏纂玄且見吾邈世無悶也

歲戊戌詔試儒士時恩制寬或以廼嗣長可從師取應
先生曰以闕為利非敢聞命嘗庭訓憚忱曰吾已錯斷
不容再寒殍死無掾習能儒素起家其榮多矣然學貴
專精汝不見鑑瑩則乃能別物學苟不精如治鑑不明
將安用為不學易昧涉世之道不讀麟經無以見筆削
之正吾平昔行已得乎此而已年四十六既奪先妣或
勸之娶曰其如不可乎老者繼室又先予死是轉予於
恤少者後予是吾遺累於後竟不復娶晚節號思淵老

人邦君游宦咸尊德樂道問政質疑無巨細事已率如
教丙辰春平章趙公壁以書來聘時已疾不克徃明年
丁巳秋八月十有八日考終牖下享年四十有六官至
忠顯校尉夫人靳氏相州永和人進士子玄之孫安陽
丞顯思之次女貞靜淑善光備婦道生二子憚忱先卒
用戊午春三月葬汲縣親仁鄉之新阡先妣祔焉先君
資剛明簡密議論長慮惠深雅以大用自期人亦以此
與之握瑜懷瑾羣而不矜其當官宰務人莫能措手者

率優為之不聲色少動外事緩急不一言及家人至於
吏筆縱橫緣以儒術乃其末耳又善尺牘簡而盡書勁
韻有風格作楷字日滿萬間一異書佔畢如不及多積
至千餘卷友人劉冲見之曰何自苦如是先君曰素無
長物非此無以遺子孫其遠大如此所交皆一時名士以
取容阿匱為恥生平非疾病未嘗見日而作三十寒暑
兩易裘褐居家寡言笑以身為律度人望而畏愛若一
官府然嗚呼先君以刀筆起身垂聲當世於先業為光

大惟其秉彛粹慤思欲克其所未至進進焉不容自己
絕不齒故習一肆於學根極羣經務明大本復旁通天
人之術以濟厥用其修已應時開物成務之志是可涯
際邖然時與命揆壽止於斯不獲卓犖大見於世今憚
等聆風樹而含悽履霜露而興感抱昊天明發之悲也
愴想平生鏤茲礦石庶幾慰安神靈永閱窀穸之藏銘
曰

繫扈王氏世業農高曾而下掇習同大風泱泱動南廊

於爍先子德所鍾一日奮起蛇化龍樹立先業何光融
獄惟平反匪厥躬要以明恕剛而中廷平釋之唐有功
漢二千石世業公剖裁錯節輸神鋒庶幾凜凜德讓風
虞淵日入不可腫布衣歸來默而容春秋大易羅心胃
跡蟠於泥氣則虹冀北一顧凡馬空道雖人弘繫其逢
維弗卒施為世恫兒能讀書亢吾宗白首敢計達與通
閉門疏水甘長終翠微之居竊以重一債不起胡閭凶
悠悠大鈞問無從太行西峙泉流東九原盤盤佳氣葱

魂兮歸安此新宮

先妣夫人靳氏墓誌銘

先妣縣君姓靳氏相州安陽永和鎮人永和自唐歷宋
為名縣鴻儒鉅族代櫛比出靳氏其一也家故饒財世
以孝義著聞鄉里祖諱師揚字子玄舉進士詩賦聲動
場屋間以恩賜第授彰德府教官金百餘年鄴下論人
文之選者殿元為稱首

闕

人外祖其季

也為人儀觀秀偉髯滿

闕

喜

闕

馬

闕

滿經

犬游獵橫漳間有河朔故家豪習嘗官安陽永生二女

先妣其次也

姨母適李氏令為召居鄉里有一子

既歸王氏先祖時已歿

祖母韓性貞明持門戶益嚴先妣孝養恭順故閨門內
事僅絲髮比不敢專須請之後行祖母以是賢之非大
故未嘗踰外閭姻黨有以合二姓會諸親者先妣與焉
里中諸媼至顧而不知為誰平居課兒輩讀書旁治絲
枲須夜分乃休樂聞古人母儀女誡及善惡興衰等事
怡然有得至寤寐思服旦起愛晴爽問或旱則晴燥溢

則

闕

陰輒愀然不懌曰歲功一失憂有大於

闕

不然

喜津津見顏色先妣性溫純慈祥居家

闕

容儀無

啞啞言笑

闕

人物不忍少休內外

闕

以厚平生

不能易

闕

物心懔懔惟恐我之

闕

人也世方以服飾

相高

闕

羽耀閭閻甚者託燕游以私謁為事先妣聞而

闕

之朝夕志女功主中饋被服在躬承祀孔時嘗以

事當出乃歸而不自安者移時其幽閒貞順之德蓋可

知矣歲戊申夏六月竟以憂勤致疾越明年己酉秋七

月廿有九日化於私居之適寢壽四十有五先君識明
達既失內助斷不復娶祖母倦勤稍以內事傳新婦崔
氏每取先妣婦道是訓因追悼曰汝姑醮王氏二十有
五年有子有孫未嘗以主母自居失為婦禮勤已至矣
不獲少慰劬勞而止於斯可勝痛哉嗚呼天道悠悠報施
善人果可必而恃邪故臨終

闕

嗚呼哀哉天乎憫

何罪而至此極耶追念祖母疇昔之言隱然恫於心故
茹哀銜恤於茲八年惟是伸荼毒慰下泉發幽光而圖

不朽宜銘德莫若哀號泣涕以畢其辭銘曰

坤柔之德婉以從健而幹蠱匪婦功伯姬之卒諡以共
淑慎先妣柔所鍾主夫中饋成肅雖春秋承祀被僮僮
善人獲報天乃公嗚呼福壽不一逢歸咎無處恫厥躬
寔祔無憾哀送終萬家之原偃斧封泉流可竭恨不窮

故權左司都事趙君墓銘

君諱謙字和之世為益州人中統元祀用薦者言以材
幹補行臺左三房提控令史二年春考政上都與予同

遊居者數月用是情好日洽夏六月闔臺南還君為中
省苛留乃以都司擬之作駐久計君怫然不樂求亟去
甚銳事業已不許信宿疽發於腦戶呻吟無聊殆不能
堪醫庸藥安一刺而肆裂越三日予與楊易州恕謀曰
常山瘍醫麻澤民今之俞跗也適召至若禱於院使王
君儀之可一來救藥凡三往得請踵及門中使趣去之
自是內侍不出者幾浹旬後五日夜聞君聲漸嘶報燭
起視向壁卧頭岑岑不舉矣比明臭惡達戶外僣從止

一老傖顛且愚瞠不知若何訪求知故無一人予惻然
感傷冒臭惡易衣衾視其疾緩急困則對榻衣寢自疾
亟迄蓋棺凡五旦夜得年五十有七實中統二年七月
廿有五日也嗚呼哀哉以義以友喪無歸責實在我既
斂詣堂中請曰吏趙謙以守官客死禮以公給喪郎中
賈君仲明憐之官為賻緡錢千躬為護喪出郡城東門
郊外適表親徐貞者至付之俾輶載歸燕君短小精幹
審於吏計蚤歲從事課府以廉介稱杯酒間言笑啞啞

殊不知為肅慎氏之族也。木甲稱者，聲近趙家，故以趙定氏云。銘曰：

志樂而奚庸，氣信而弗窮。曾不知安於命而為通也，心與事揆，卒與禍逢。奈何乎趙公！

故南塘處士宋公墓誌銘并序

南塘處士宋公捐館之九年，當強圉赤奮若其月，建亥夫人魏氏奄棄榮養。仲子繼祖等託叅卿趙君禹卿致其命來請曰：「先人墓壙未克埋，銘今將啟幽堂，祔安妣。」

喪于柩之左寔有日幸吾子速銘以光此大事某追維
維尹平生之言重以禹卿孔懷之義勉為次序之公諱
珍字子玉姿秀偉有德度早能詩華藻玄深造理窟散
髮揮麈瀟洒有出塵想故中書令耶律公一見偉其貌
奇其才至贈詩稱與有柱石中原之目遂薦為朝廷侍
從官既而嘆曰吾志在長林豐草間清泉白石金馬玉
堂非所樂也乃辭去中舍復授以資使職亦不就歲甲
辰自雲中徙家燕都得金溝水南形勝地十餘畝疏沼

種樹中構堂曰麗澤碧瀾秀挺景氣二勝日以琴書自
娛教子孫為業野服高閒漠然不以世務撓其懷然性
喜賓客樂觴詠所交皆一時俊人如王慎獨之愷悌張
隣野之諧傲醞藉如楊西庵才鑒若姚雪齋王鹿庵之
品潔一世商左山之凝重朝右每光風霽月過其居者
燕樂衎衎必極歡而後去太史公曰視友知人公之行
已槩可見矣夫人魏氏有賢淑行輔承內治能遂公初
心四子幼服庭訓皆賢孝負藝學長曰紹祖少中大夫

河南府路總管次繼祖不仕次光祖侍儀法物庫使次
仁祖以琴阮供奉孫十人曾孫四女孫一十四人時節
賀慶蘭芽玉樹瑤環瑜珥秀映庭戶以次列拜上酒介
壽公與夫人亦舉觴酬酢一家之內樂融融也公以至
元己巳秋八月考終牖下春秋七十有七越明年庚午
冬葬大興縣招賢鄉之南原夫人之歿實至元十四年
冬十月廿五日也壽八十宋氏上世本蜀成都人遠祖
有官吉州之吉鄉者遂為河東人曾祖元祖信考章俱

有儒行不耀其幽光潛德發於公之身者宜烜赫然公復謙抑不盡享其篤祜遺其子孫至光盛如此銘曰
名籍朝端身心考磐貞不絕俗道出夷惠之間以儒雅而擅一時儋天爵而享高年服食華鮮子孫滿前飄纓若綬照耀後先沒而從祖是之謂祉全我銘納壙復慰下泉千年而見白日尚知為青山白雲之僊

大元故蒙軒先生田公墓誌銘

金源氏踵唐宋舊制以舉業取士號稱文武正科大定

明昌間人材輩出天下英雄盡入吾彀中南渡後境壤感
時事艱其自淵源見聞中來者多憂深思遠忠義奮發
懷赴赴干城之況其風聲氣習歌謠慷慨而有故家遺
俗者哉公諱文鼎字仲德姓田氏其先世京兆醴泉縣
人曾祖俊正隆初董升官後因家太康之侯陵祖秀從
居蒙城遂占籍焉祖用御史君貴贈上輕車都尉雁門
郡開國伯妣尹氏贈雁門郡君父芝貞祐二年進士第
官至嘉議大夫鎮南軍節度副使資雅重有相望妣楊

氏雁門郡君公生而爽朗稚時已軒露頭角棖觸物論
為奇童嘗問學燕山張公一見即以不羈許之為人有
膂力善挽強汴京受兵得請於香林先生應募自効執
政以公書生年少初不之意及觀其拳勇試以方畧詢
之宛如宿將射敵慮無策遺以勞授武節將軍西南面
元帥府總領仍佩金符以寵異之京師饑遣公將五百
人取封丘麥既還去城遠條千騎來襲衆欲鳥獸散公
曉之曰彼騎我步若前遮後蹂逃將安之即分為二隊

相去各里許結陣而待戈矢外翼負者居中轉戰轉退
手先作氣敵叵測不敢追比至城下不亡斗麥一卒執
政才其為命監鄭門前後出活飢民甚衆汴梁下縱民
四出護二親北渡時同發者數百家奉親外救死問疾
往來保庇不少倦如渾源劉初母洎祖母病死半塗二
子相顧號泣而莫之何公為死瘞生負兩皆得所其處
患難中自掄不暇能急人之急如此何義烈哉遂來居
相下以養親讀書為事浙米負薪日供所需以盡子職

既而應廉訪劉汝翼辟為幕寮官時朝廷遠駐龍朔凡
上計三往返事集而無難色歲壬子輔國賢王定封彰
德為分地擢用賢雋特授公為本道課稅所經歷時持
政者多不法公諫止不從即投劾去後果敗中統初又
為叅政高挺辟署河東行臺幕屬無幾罷歸公少負氣
挺節持論高料事明義之所在勇于必為自視以為一
世奇士幅巾藜杖掉頭吟諷不知去古為遠邇惟其學
高六藝名重一時邦君時相爭以禮幣招致尚期有可

為而為之者然以天性太剛又不屑取媚於時故其抱
負治具竟不百一試晚節與西巖張易緱山杜瑛以詩
酒自娛不復談經世事矣臨終語其子復曰士之出處
莫非義命道行志通伊周不為之泰道窮志湮顏原不
為之否從古迄今有才不過窳死溝壑者豈獨予哉是
非所當戚戚於吾衷也蒙軒其自號云公善作詩工書
學道麗有楷法至於丈尺大字尤極精妙云癸酉春二
月七日以疾終廣川客舍享年六十有三夫人慶陽李

氏系出唐薛王前進士司農丞無黨女恭儉淑善母道光備教子孫有法白首一節安公之貧後公八年辛巳歲亦二月七日終於家壽六十有八生二子一女嫁士族子復傳家學有詩聲終河間漕司從事衍富文學通吏事由憲臺史轉補中書掾今為禮曹主事庶克光紹遺緒云孫六人曰伯耕曰叔耘叔耜曰重曰某衍將以年月日舉公柩葬彰南新阡再拜來請銘惲雖後進嘗獲拜履慕知公為頗詳既序其行已敢以生平底蘊

未克展盡為士論所痛惜者銘之銘曰

士貴尚志趨事赴功況作而行之迺士夫之所崇矯矯
田公繫時之雄振靈修之遠駕思從事而匪躬文章足
潤身之具才武是將領之風桓桓英挺明夫戰攻解臨
機而制變張國威於小戎奔走急難笑談折衝朔漠三
徃冀羣一空顧曷職而弗辦曾漕計之是供政不我俾
坐困簿叢寧窘澗阿肯與彼同利器百而不一試在先
生為不逢道義蟠匄伊周是宗既得喪之不我與吾何

為而戚乎來有軒曰蒙獨善固窮閉戶讀書飲水長終
人邪天邪問大鈞而無從惟子孫之可卜見德澤之所
鍾繫臺閣之就列蔚珪璋之顒顒洹流必北太行之東
雖高深兮易位尚知為蒙軒先生之封

故正議大夫前御史中丞王公墓誌銘

并序

至元二十六年二月丙辰辰刻正議大夫御史中丞橫
海王君以疾卒於私第正寢斂有七日其子庸彛輩哀
服纍然持事狀百拜以壙銘來懇以義以分有不得辭

者公諱復字子初初名趾麟伯其字曾祖瑜大父松世家滄州俱隱德不仕禰府君諱昌齡金季嘗遊宦河南大梁亡起從恒山史侯叅議軍府事後以公命來攝衛州事有惠化於民惟君器識早為經畧公所知己未冬自齊經中起君襲父職仍領州務明年中統建元真授衛輝二府同知又明年由州而路就陞貳總尹君遵守成憲越先正有光至元甲子轉官制行授朝請大夫改倅彰德路無幾以德望入為中書兩司郎中調議密勿

宰相至以佳士上聞魏河朔鉅鎮吏重而俗囂號難理
特輟君以少尹來治迺曰清心不如省事省事莫若先
殺吏權於是汰冗濫屏姦惡絕私謁尚德化民有李氏
者珥筆構黨持短長嚇官府張甚君發其姦杖陪之萬
喙稱快自是合郡向風書葉翻香曹務為清簡八年辛
未春自中書舍人出知歸德府府居河下流其秋水大
至環城為海衆胥沉為憾君乃督權師浮舟楫濟民於
丘陵林木上遂相水衝循橫堤疏二渠一注汜瀆一達

河故道水隨退得腴田萬頃佃貧民仍請廩粟得萬五
千石活飢殍者既而復捷治回龍堤葛邑壩於府西以
絕永患曰烏可使吾民重漬於泉故水去而民益親繼
丁母夫人憂去職未暮詔起君充河南道宣慰副使國
家方有事襄漢順流以成破竹之勢故軍需百色羽書
交督急於星火一責於我中間籌辦君力為不少時大
軍復東掀五河戰力而餽乏河走陵蔽川不易轉致衆
艱於行君毅然以漕事自任至撞冰東下一夕凍斂解

軍威藉以振衆且服君事不辭難而害不苟避有如此者明年超擢陝西四川道提刑按察使尋進拜嘉議大夫行臺御史中丞用膺才選既署事有告蘇州應草竊以城叛者或議調急兵徑討公曰維揚去吳纔三百里不當猝有此變恐憚人流言激之開乘間以利賄耳與省議合遂駐兵迎郊偵其實繼發未晚已而果如料吳人得無虞而安其臨大事處置明審例如此淮甸沃壤千里公於上前論奏宜設農司募游食者開耕屯以盡

遺利若爾非惟實內地且威別遐陬坐銷外侮遵其議
付有司施行俄加正議大夫徙按河東山西道以事免
歸居三年竟以疾縛之遂至於斯哀哉享年六十有四
前後寵錫凡十有一命官極通貴哀榮終始不為未遇
以是月壬申葬汲縣親仁鄉王尚里禰塋三昭首穴夫
人爪爾佳氏前公卒再娶夫人秦氏生二子曰彞曰範範
前公九月暴卒二女長歸徒單衍亡次適趙常白夫人
杜氏生子曰庸曰子度二子並愿而有文學皆公所自

教云曰女壽適陳氏皆先亡孫二人曰青牛範之子一
在祿公為人器量弘深有經史學善持論識變通無贅
言居養甚重周防甚謹及開物成務當其可為推致所
學惟恐不臻於極然事無巨細率以大體中持恥近效
取譽所謂以道事君者近之至威儀柔嘉小心式訓又
類夫仲山甫衛武公之行已承旨鹿庵王公人品清峻
慎許可嘗有詔詔公舉可執政者廼以君名進奏其經
濟德業可知已初官河東時憲府爭索隱幣以副上需

分司者不計應否悉掩為已功弊久恬不為怪至是公以前行沒入十萬餘緡盡給之民又平陽府胥有以母喪甫窆輒從吉執役者公曰忘孝之人胡可與處廼按而斥之其惜體正俗又如是可書者尚多惟著其繫夫事之重者恐亦公之志也歟銘曰

大學為道將何為俾明一德新民彞行焉而底善是依要本平治先修齊俾明厥體用或違其在孔學非吾知倬哉王公天秉岐自稚細行初不遺若考翼事子肯基

一日雲厦看巍巍敷歷中外厚自持柔嘉維則非公誰
又復當用行不疑翰音登天翅屢垂越若有物中繫維
從心罔單體非羸期于俯仰無忸怩人或咨惜我獨熙
以道事君其庶幾六十四載麟儀儀綬何若兮印何累
賁夫松楸餘光輝天其或靳將後貽俾為清廟壁與圭
奉之天門光陸離仙山東麓朝氣霏佳城鬱鬱君所歸
歿而從禰為受釐足慰下泉含笑嘻零落不必西州悲
我銘昭昭惟昧詒

秋澗集卷四十九